

欽定河源紀畧卷十五

證古二

蔥嶺河源

謹案漢書西域傳云東則接漢扼以玉門陽關西則限以蔥嶺夫大河源流百折必東而蔥嶺居西域之正西其爲河源明矣唐西域記云蔥嶺南接大雪山北至熱海千泉西至活國東至烏鍛國南北各數千里涼土異物志云蔥嶺之水分流東西西入大海東爲河源今考蔥嶺之流之水一曰蔥嶺北河卽水經注所謂北河又

欽定河源紀畧

卷十五

證古二

一

東北流者是也一曰蔥嶺南河卽水經注所謂自岐沙東分南河者是也釋氏西域記謂二支北流逕屈茨烏夷禪善入牢蘭海謂此南北二河同出蔥嶺又東注洶澤也今以回部輿圖證之北河當爲喀什噶爾水南河當爲葉爾羌水二支皆東北流入羅布淖爾與水經注所載二支入牢蘭海者全合謹按據古今地志兩兩參覈乃知西域水道雖未必盡無移徙而流逕大端要可一一證合焉

漢書西域傳其河有兩源一出蔥嶺山

後漢書西域傳其河有兩源一出蔥嶺東流
水經又南入蔥嶺山又從蔥嶺出而東北流
水經注涼土異物志蔥嶺之水分流東西西入大
海東爲河源

右河出蔥嶺

水經注河水自蔥嶺分源東逕伽舍羅逝國釋氏
西域記曰有國名伽舍羅逝此國狹小而總萬國
之要道無不由城南水流東北出羅逝西山山卽
蔥嶺也逕岐沙谷出谷分爲二水又云北河東北
流枝流出焉北河自疏勒逕流南河之北暨于温

欽定河源紀畧

卷十五

證古二

二

宿之南左合枝水北河又東逕姑墨國南北河又
東逕龜茲國南河水又東逕墨山國南河水又東
逕注賓城南又東逕樓蘭城南而東注河水又東
注洶澤

謹案水經注云河水出羅逝西山山卽蔥嶺又
云逕岐沙谷分爲二水考

欽定西域圖志蔥嶺有二河北爲喀什噶爾達里雅南
爲葉爾羌諤斯騰喀什噶爾爲古疏勒故酈注
云北河自疏勒逕流南河之北葉爾羌爲古莎
車故酈注于南河云又東逕皮山國北西去莎

車三百八十里也漢書云從鄯善傍南山北陂河西行至莎車爲南道西踰蔥嶺則出大月氏安息自車師前王庭隨北山陂河西行至疏勒爲北道西踰蔥嶺則出大宛康居奄蔡據此則疏勒在蔥嶺之東北故河爲蔥嶺北河莎車在蔥嶺之東南故河爲蔥嶺南河此其大較也疏勒爲今喀什噶爾地北河自疏勒逕流南河之北則爲喀什噶爾河無疑考唐西域記波羅川中有大龍池池東派一大流東北至佉沙國西界與徙多河合而東故此已左水皆東流西域

欽定河源紀畧

卷十五

證古二

三

記又云佉沙國舊名疏勒徙多河卽中國河今考蔥嶺北河正從喀什噶爾西界東流卽佉沙國西界之徙多河也北魏書疏勒南有黃河蓋河自喀什噶爾之西又流逕喀什噶爾之南故曰南有也隋書及西域記謂渴盤陀國都蔥嶺中負徙多河渴盤陀在疏勒西南六百里今蔥嶺北河在疏勒之南渴盤陀之北故渴盤陀都城北負徙多河也通鑑唐德宗紀娑葛發五千騎出疏勒郭元振在疏勒柵于河口不敢出當卽今之喀什噶爾河口也

又案後漢書耿恭傳云恭以疏勒城傍有澗水可固又云匈奴遂于城下擁絕澗水今木什河特們河在喀什噶爾城北赫色勒河特爾墨楚克河在喀什噶爾城南皆近在二十里內俱出喀什噶爾西北山則卽耿恭所謂城傍有澗水也匈奴擁絕澗水當并城北之木什河特們河及城南之赫色勒河特爾墨楚克河皆擁絕之蓋南北澗水俱絕故恭始于城內穿井也

又案酈注云北河暨于溫宿之南考後漢書西域傳疏勒東北經尉頭溫宿以

欽定河源紀畧

卷十五

證古二

四

欽定西域圖志考之溫宿爲今阿克蘇在喀什噶爾東北與疏勒東北經溫宿方隅相合今喀什噶爾河東北流逕阿克蘇之南卽酈注所云暨于溫宿之南也酈注又云北河又東逕姑墨國南又東逕龜茲國南考漢書西域傳姑墨東通龜茲六百七十里龜茲西與姑墨接以

欽定西域圖志考之姑墨在今庫車之西雅哈阿里克左右龜茲爲今庫車彼此相距里數古今符合今喀什噶爾河東北逕雅哈阿里克又逕庫車之南卽酈注所云北河又東逕姑墨國南又東

逕龜茲國南也酈注又云河水又東逕墨山國南考山國西至尉犁二百三十里西北至焉耆百六十里以

欽定西域圖志考之尉犁爲今哈勒哈阿瑞焉耆爲今哈喇沙爾墨山國旣當在哈喇沙爾東南百餘里在哈勒哈阿瑞之東二百餘里則其地約直今伊德格爾阿拉爾東南境矣酈注又云北河又東逕注賓城南又東逕樓蘭城南注賓城于漢書西域傳無考其在樓蘭之西無疑此河自樓蘭東注沕澤則注賓樓蘭皆在今羅布淖爾

欽定河源紀畧

卷十五

證古二

五

西北可知也一統志以噶斯爲樓蘭亦與酈注所云自樓蘭東注澤合也攷新唐書地理志自蒲昌海南岸西經七屯城漢伊修城也又西八十里至石城鎮漢樓蘭故國也在蒲昌海南三百里以輿圖證之今噶斯淖爾迤西戈壁之地正在羅布淖爾西南其距羅布淖爾里數與唐志合則噶斯迤西真古樓蘭河水北逕噶斯西戈壁之地然後東注羅布淖爾卽酈注所云注賓河逕樓蘭北又東注澤也新唐書地理志石城鎮又西二百里至新城又西經特勒井渡且

末河五百里至播仙鎮古且末城也然則注賓
河流逕之地當在唐特勒井石城鎮以東與今
厄爾勾河爲近也

右蔥嶺北河卽喀什噶爾河

水經注一水東流逕無雷國北又東流逕依耐國
北去無雷國五百四十里河水又東逕蒲犁國北
北去疏勒五百五十里河水又東逕皮山國北西
去莎車三百八十里

謹案酈注載南河所逕一曰無雷考漢書西域
傳無雷西至蒲犁五百四十里南與烏秣北與

欽定河源紀畧

卷十五

證古二

六

捐毒西與大月氏接今以

欽定西域圖志考之無雷當爲今之阿喇楚勒葉爾羌
河發源處在其東南數百里酈注云逕無雷國
北于方隅稍有未詳其他所逕之國與今圖志
無不脗合酈注載南河所逕又一曰伊耐一曰
蒲犁考西域傳蒲犁北至疏勒五百六十里東
至莎車四百四十里則蒲犁在莎車之西疏勒
之南又考西域傳蒲犁東至莎車五百四十里
西至無雷五百四十里伊耐亦東至莎車五百
四十里西至無雷五百四十里然則蒲犁伊耐

俱當在莎車無雷之間西域傳又云蒲犁北至疏勒五百六十里伊耐北至疏勒六百五十里然則伊耐當在蒲犁之南今喀爾楚東至葉爾羌城五百餘里東北至喀什噶爾亦如之與西域傳蒲犁東至莎車五百四十里北至疏勒五百六十里正合則喀爾楚爲古蒲犁無疑而喀爾楚南山谷間爲伊耐國無疑今葉爾羌河南源逕喀爾楚南又東北流則卽酈注所云南河又東逕伊耐國北也又逕喀爾楚北而東北流卽酈注所云東逕蒲犁國北也今喀爾楚北至

欽定河源紀畧

卷十五

證古二

七

喀什噶爾五百餘里則卽酈注所云又東逕蒲犁國北去疏勒五百五十里也酈注載南河所逕又一日皮山國考西域傳皮山西北通莎車三百八十里于闐西至皮山三百九十里今都窪東北至和闐伊里齊城三百五十餘里與西域傳皮山東距于闐三百九十里合薩納珠西距葉爾羌城四百里與西域傳皮山西北距莎車三百八十里合然則都窪以西薩納珠以東爲古皮山國甚明今葉爾羌河逕薩納珠西北卽酈注所云又東逕皮山國北也注所言蔥嶺

南河逕由之國皆今葉爾羌河所逕之地則葉爾羌河卽蔥嶺南河可知矣

又案新唐書烏鍛北徑磧曠野五百里得疏勒東南五里濟徒多水踰大沙嶺有斫句迦種或曰沮渠斫句迦卽莎車謂濟徒多水至斫句迦

則徒多水乃葉爾羌河也

西域記徒多河卽中國河此所云徒多水

當作徒多水徒徙字相近而訛耳

今由汗阿里克南濟河至葉

爾羌卽所云濟徒多水至斫句迦也西域記又謂斫句迦國都城周十餘里山阜連屬沙石瀰漫臨帶兩河今葉爾羌城環夾南北兩河之中

欽定河源紀畧

卷十五

證古二

八

卽西域記所云臨帶兩河也

南河又東逕于闐國北釋氏西域記曰河水東流三千里至于闐屈東北流者也漢書西域傳曰于闐以東水皆東流南河又東北逕扞彌國北治扞彌城西去于闐三百九十里南河又東逕精絕國北西去扞彌四百六十里南河又東逕且末國北又東右會阿耨達大水釋氏西域記曰阿耨達山西北有大水北海注牢蘭海者也其水北流逕且末南山又北逕且末城西又曰且末河東北流逕且末北又流而左會南河會流東逝通爲注賓河

又東逕鄯善國北其水東注澤釋氏西域記南河自于闐東北三千里至鄯善入牢蘭海者也北河自峽沙東分南河卽釋氏西域記所謂二支北流逕屈茨烏夷禪善入牢蘭海者也

謹案酈注言南河所逕自于闐外一曰扞彌考漢書西域傳扞彌南與渠勒東北與龜茲西北與姑墨接西通于闐三百九十里考

欽定西域圖志庫車爲古龜茲雅哈阿里克爲古姑墨新唐書自龜茲羸六百里有跋祿迦小國一曰亟墨卽漢姑墨以

欽定河源紀畧

卷十五

證古二

九

欽定輿圖度之則雅哈阿里克左右當卽其地漢西域傳謂扞彌東北接龜茲西北接姑墨則在今庫車之西南雅哈阿里克之東南又考漢西域傳姑墨南至于闐馬行十五日是于闐當姑墨之南而扞彌在姑墨東南則在于闐之東可知故西域傳謂扞彌西連于闐三百九十里也今克勒底雅在伊里齊東四百三十里與西域傳所云扞彌西通于闐三百九十里合則古之扞彌今之克勒雅也又酈注言南河所逕一曰精絕考漢書西域傳精絕北至都護治所二千五百

五十三里于闐東北至都護治所三千七百二十里是都護治所在精絕直北在于闐東北以次推之則精絕亦在于闐東北矣故酈注言南河自于闐東北逕精絕也今策特爾爲古之烏壘卽都護治所然則古之精絕當在今策特爾之南今阿氏爾干在策特爾南西距額里齊約千餘里與精絕西去于闐里數大畧相合則古之精絕今之阿氏爾干也又酈注言南河所逕一曰且末考漢書西域傳且末城北接尉犁尉犁在焉耆西南百里焉耆爲今之哈喇沙爾則

欽定河源紀畧

卷十五

證古二

十

尉犁當爲今哈勒噶爾璊今噶斯迤西戈壁爲古且末其北對哈勒噶爾璊則卽所謂北接尉犁也以上水經所載南河逕過之國其西距南河里數甚遠皆非南河所經之地但考于闐東北皆戈壁西域記謂于闐東行入流沙沙磔流漫聚散隨流又行無迹遂多迷路四遠茫茫莫知所指行四百餘里至覩貨羅故國國久空曠城皆荒蕪從此東行六百餘里至折摩馱那故國卽湟末地也卽且末城郭巋然人烟斷絕從此東行千餘里至納縛波故國卽樓蘭是于闐東

北境一二千里可名國者不過二三餘皆沙海絕無邑都酈注欲記南河所逕不得指沙磧無名之地以爲標準精絕且末距南河雖遠然舍此更無近國可表方隅矣考酈注謂南河旣逕于闐國北然後逕扞彌精絕且末國北是此數國皆由東向北故釋氏西域記南河自于闐東迤北三千里也南河距此諸國之治雖遙而距此諸國之境尚近故畧舉所過之境以識南北爾又案唐地理志于闐西五十里有葦關又西經渤海西北渡繫館河六百二十里至郅城則是自于闐西北至繫館河六百七十里又考漢西域傳于闐西至皮山三百八十里皮山西北至莎車三百九十里則是于闐至莎車七百七十里以今輿圖度之漢西域傳于闐至莎車道里與今和闐伊里齊至葉爾羌道里相合唐地理志于闐至繫館河道里與今伊里齊至聽雜河布河相合聽雜阿布河卽與葉爾羌河會流東逝者也卽渡聽雜阿布河百里乃至葉爾羌城卽唐志所謂渡繫館河至郅滿城也

右蔥嶺南河卽葉爾羌河